

Presiden Baharu: Hubungan Baik Indonesia-Malaysia Tetap Utuh

Bernama

Jun 20, 2014

KUALA LUMPUR, (Bernama) -- Hubungan baik antara Malaysia dan Indonesia akan terus terjalin seperti biasa tanpa mengira siapa calon presiden yang akan dipilih pada Pemilihan Umum (Pemilu) Presiden Indonesia Julai ini, kata Duta Besar Indonesia di Malaysia Herman Prayitno.

Beliau memberi jaminan bahawa hubungan serumpun antara kedua-dua negara akan selalu dipertingkatkan agar ia berjalan baik seperti sekarang.

"Tidak kira sama ada calon Presiden Prabowo Subianto dan pasangannya Hatta Rajasa mahupun gandingan Joko Widodo atau Jokowi-Jusuf Kalla yang terpilih, hubungan kerjasama antara kedua-dua negara akan tetap diteruskan.

"Baik Probowo mahu pun Jokowi, kedua-duanya sudah pernah ke Malaysia jadi saya kira tidak timbul permasalahan," katanya kepada Bernama.

Pemilu Presiden bagi penggal 2014-2019 akan berlangsung pada 9 Julai ini dan ia merupakan Pemilu yang ke-11 sejak republik Indonesia mencapai kemerdekaan.

Herman melahirkan harapan calon presiden yang terpilih akan berupaya untuk membangun dan melestarikan perhubungan erat yang terjalin antara Indonesia dan Malaysia serta meningkatkan kerjasama untuk memakmurkan Asean.

Bagi memastikan perkara itu dapat dilaksanakan, beliau bertanggungjawab untuk memaklumkan kepada presiden baharu mengenai hubungan baik antara kedua-dua negara termasuk daripada aspek dagangan dan sosio-budaya.

"Saya akan melaporkan situasi ini kepada presiden yang baharu. Apabila ada permasalahan, kita akan tangani dengan cara Asean, kita akan berdiskusi dan akan selesaikan dengan cara persahabatan.

"Sehingga hari ini tidak ada rasa permusuhan dan curiga seperti masa lalu. Kita harus saling mendekati satu sama lain dan menggunakan pendekatan satu ikatan satu rumpun untuk menyelesaikan masalah yang ada dan maju bersama-sama.

Prabowo-Hatta dinamakan sebagai calon presiden dan naib presiden pada Pemilu itu oleh pakatan yang diketuai Parti Gerakan Indonesia Raya (Gerindra), manakala Jokowi-Jusuf Kalla daripada Parti Demokrasi Indonesia Perjuangan (PDI-P).

Memetik laporan Bernama sebelum ini berhubung pemilihan calon presiden Indonesia, bekas perdana menteri Tun Dr Mahathir Mohamad berharap agar presiden baharu itu dapat memperbaiki lagi hubungan antara Malaysia dan Indonesia, negara berjiran yang mempunyai banyak persamaan termasuk daripada segi budaya dan agama.

Dr Mahathir berkata hubungan baik antara negara berjiran ini tidak hanya membawa keuntungan kepada Indonesia dan Malaysia namun sangat penting bagi Asia Tenggara.

-- BERNAMA

Copyright © 2014 BERNAMA

Source: <http://www.bernama.com/bernama/v7/bm/newsindex.php?id=1047873>